

Scola e teritorie: n leam n muie strent

I bec de 4^a e 5^a de la sezion èrt del legn i à prejentà a l'aministrazion de comun de Cianacei i projec per la neva califcazion del zenter storich del pais



I raprezentanc de la doi clasc de la Scola d'èrt con i libes doné da l'aministrazion de Cianacei.

Scola - Enstadì l'aministrazion del comun de Cianacei la se à spostà ja Poza, più avisa te sala grana de la Sorastanza de la Scola de Fascia. L motif l'era scempie e se l'entenea giusta ite da usc, ajache te sala per l'ocazion l'era stat metù na fila de desc che era duc pien de sfoes da dessegn con su desvalives projec. Sun chisc sfoes l'era su i projec per la neva califcazion del Zenter storich de Cianacei.

L'idea de meter a jir na colaborazion anter Scola e Comun la era nasciuda da Alessandro

Anesi, conseier comunèl de maoranza e president del comitat de Cianacei. La colaborazion anter Scola e teritorie l'é n segn n muie positif che, descheche à sottrissà ence la Sorastanza Mirella Florian, fesc a na vida che i doi sogec i sie vives e più riches.

I bec e la bezes de la 4^a e de la 5^a de la Scola d'èrt de la sezion èrt del legn i é doventé protagonisè atives e i lura per troèr vèlch idea e soluzion per na recalifcazion del Zenter storich de Cianacei. Col didament fundamentèl de si

professores Franco Ghetta, Claus Sorapera e Flavio Tessadri, duc i joegn i à emparà a lurèr a dret contat con la realtà. Descheche fesc i profesionisè, i studenc i é stac ta Cianacei per fèr relieves sul post e dapò n'outa tout jù chel che servia i é ponté via col lurier a scola. Proprio per portèr dant chest projet i studenc, con la professora Petri de l'Università de Trent, i à emparà a durèr Autocad, n program per dessegnèr al computer.

N'outa sarà sù la pèrt di

rengraziamenc e i saluc, l'ombolt de Cianacei Mariano Cloch e Alessandro Anesi i à volù ge sporjer en don a la doi clasc doi libes su l'èrt. Donca l'é ruà l moment de tachèr la raida e duc chenc con biro e sfoi, man a man che i studenc i portèa dant sie lurier, i segnèa la valutazions e la stimes.

L'obietif no l'é stat segur chel de troèr fora l venjidor, ma chel de dèr na valutazion ai projec per veder colun che aessa podù responder miec a n giudizie rèel, desche se dassen i aessa tout pèrt a n bando publich.

L'é stat n lurier segur senester per i studenc, ma ence per i professores che i à cognù i didèr

te ogne vèrech. La sodesfazion de aer fat zeche dassen de ütöl che i li à fac ruèr a dret contat col teritorie e con na esperienza rèela de lurier l'é stat per duc n stimol emportant. Descheche à dit l professor Claus Sorapera "no cognon se desmentìer che la gran zitèdes les é states bones de aer gran luster de gra a n binomie, chel anter aministradores e artisè".

I compliment e i rengraziamenc i é rué amò n'outa da l'ombolt Mariano Cloch a la fin del percors de prejentazion di lurieres. No se sà mai che anter duc chisc n festil, n lampion o na banca no i vegne dassen metui fora stroz per Cianacei. (vvr)



Endèna la prejentazion di projec.

Cianton ensema

L grop de teater "Amisc per cajo" à portà dant na bela comedia musicala a favor de la sociazion Bambi

Teater - L'é n grop de amisc che se à metù ensema béleche "per cajo" chi che à portà dant enstadì la comedia musicala "Cantiamo Insieme" te teater Oratorie de Moena, co la colaborazion del Comun e de la Cassa Rurala. Na trentina de atores, da la più picola de nience 6 egn, al più espert de teater desche Iginio Taliani, che se

à dat jù duc ensema per spilenar l'òpera tutta dal musical "Tutti insieme appassionatamente" sot la regia de Valentina Zanoner. N esperiment garatà che à conjobià le part spilenade, coi tòc cianté e chi touc dal film medemo e che à comportà segur n gran e lonch lurier de regia e de studie de le part, de le scene e de le ciantie. I

atores se à metù a la proa palesan gaissa, snait e coraje ence percheche ciantar da soi tedant a na sala piena de jent no l'é segur sori. Da aprijar donca l'empegn, soraldut di atores più picoi che à spilenà per passa 2 ore e che te valch moment à tocià ence l cher. Volassane i nominar duc, ma ajache i é dassen n muie, recordon

amàncol i ot picoi Von Trapp: Liesl (Gaia Melillo), Friederich (Francesco Gabrielli), Louisa (Irene Defrancesco), Brigitte (Claudia Defrancesco), Susan (Lara Melillo), Kurt (Pietro Poschiavin), Marta (Maria Claudia Chiocchetti) e Gretel (Sofia Ruffinella).

La comedia musicala é stata

portada dant a favor de la sociazion Bambi e dut chel che l'é stat tirà sù jirà a didar valch familia con picoi en dificoltà. De bie compliment a duc, ai atores, ai musizisè e a chi che à lurà vindò le coltrine e speron de chisc "amisc per cajo" seghite endò prest con zeche da nef. (mci)



L grop de teater se à meritè de gregn batimans.



I bec von Trapp cianta ensema a Freulein Maria.

Sperjes o pomes rostii?
No demò TORNACONT,
ma ence CALITÀ
per poder meter sora desch
zeche de bon e san!



MOENA
Strada de Prealon 2
(vejìn a la circonvallazione)
Avert con orarie 8.15 - 12.15 e 15.30 - 19.00
Serà de jebia e domenia